

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. मुख्मन्त्री उमर अब्दुल्ला होरें पूरे जम्मू-कश्मीर च लगातार बरखा दे कारण पैदा होई दी स्थिति दा आंकलन करने आस्तै इक उच्च स्तरीय बैठक दी अध्यक्षता कीती।
2. भारी बरखा कन्नै जम्मू खित्ते च हाड़ें दी चेतावनी, दरेया-नाले खतरे दे स्तर कोला उप्पर, कई शिड़कां बी क्षतिग्रस्त।
3. डोडा च चानचक्क हाड़ परैंत बुनियादी ढांचे दी भारी नुकसान होने दी खबर ऐ, घट्ट कोला घट्ट 3 लोकें दी मौत होई गेई ऐ। वैश्वो देवी जात्तरा मार्ग पर अद् कुंवारी दे कौल ल्हास-पस्सियां पेइयां, किश जात्रु जख्मीं।
4. सब्बै सरकारी ते निजी स्कूल कल लगातार त्रीए ध्याड़े बी बंद रौहडन, भारी बरखा दे कारण जम्मू-श्रीनगर राश्ट्री जरनैली शिड़क गड्डिणं दी आओजाई लेई बंद।
5. सरकारी हायर सैकेंडरी स्कूल जिंद्राह दे अध्यापक कुलदीप गुसा होरें गी प्रतिष्ठित राश्ट्रीय शिक्षक पुरस्कार 2025 आस्तै चुनेआ गेआ ऐ।

<><><><><><>

CM-Meeting

मुख्मन्त्री उमर अब्दुल्ला होरें अज्ज बडुलै इक उच्ची सतह दी बैठक सहियै जम्मू-कश्मीर च पिछले 3 दिनें थमां जारी बरखा करी पैदा होए दे हालात दी समीक्षा कीती। उनें सरबंघित अधिकारिणं गी पूरी चाल्ली सौहगे ते सतर्क रौहने, हालात पर नेड़मी तक्क रखने ते आपदा प्रबंधन टीमें कन्नै नेड़मा राबिता बनाई रखने पर जोर दित्ता। मुख्मन्त्री होरें जम्मू प्रांतै च भारी बरखा करी पैदा होए दे हालात पर चिंता प्रगट करदे होई आखेआ जे ओह आपूं जम्मू आइयै हालात दा जायजा लैडन। उनें दस्सेआ जे सब्बनें जिलें दे डीसी-एं कश बाद्दू फंड उपलब्ध रखने दे निर्देश देई दित्ते गेदे न तां जे हालात मूजब कारवाइयें गी अंजाम देने च कोई बी कुसै बी किस्मै दी दिक्कत परेशानी पेश नेई आवै ते राहत, बचाव ते पुर्नव्हाली दे कम्में गी कन्नोकन्नी अंजाम दित्ता जाई सकै। उमर अब्दुल्ला होरें लोकें अग्गे अपील कीती ऐ जे ओह सौहगे-सतर्क रौहन ते प्रशासन आसेआ जारी कीते जाने आहले दिशा-निर्देशों दी पूरी संजीदगी कन्नै पालमा करन।

<><><><><><>

Heavy-Rainfall

समूलचे जम्मू प्रांतै पिछले 3 दिनें थमां भारी बरखा होआ'रदी ऐ ते पिछले 24 घंटे दरान समूलचे प्रांतै च हाडे आहली स्थिति पैदा होई गेदी ऐ। सब्बनें बड्डे दरेयाएं-नदिएं ते नालें च पानी दा स्तर खतरे दे नशान कोला उप्पर बने दा ऐ ते मौसम विभाग नै बरखा रूकने दे कोई आसार नेही दस्से न। झिगडे इलाकें च पानी जमा होई चुके दा ऐ ते बरखा दे चलदे एहदे च होर बादा होंदा जा'रदा ऐ। तवि नदी च पानी खतरे दे नशान कोला उप्पर बगै करदा ऐ। अतिरिक्त जिला आयुक्त अनसुइया जम्वाल होरें लोकें अगगे अपील कीती ऐ जे ओहू घरे अंदर गै रौहन ते दरयाएं नदिएं ते होरनें जल स्रोतें कश नेही जान। उनें आखेआ।

बडे मते खराब मौसम दे चलदे सब्बै सरकारी ते प्राइवेट स्कूलें गी बंद रखने दा हुक्म जारी कीता गेदा ऐ।

<><><><><><>

Doda-Flash Floods

डोडा जिले च जंदीराती आए दे चान-चक्क हाडै करी घट्टोघट्ट 3 जनें दी जान चली गेई ऐ ते जानी नुकसान दे कन्नोकन्नी काफी माली नुकसान बी होआ ऐ। स्हाडे जिला संवाददाता नै जानकारी दितती ऐ जे मरम्मत ते तांता इलाके सब्बनें शा मते प्रभावित होए दे न जित्थे कोई 15 घरे-मकानें दे हाडै च रूढी जाने दी खबर ऐ, पैदल टुरने आहले 3 पुलें गी बी नुकसान पुज्जा ऐ। नीरू, कलनाई ते चिनाह च पानी दा स्तर बडा मता बधी जाने करी आले-दोआले दे इलाकें दे लोकें लेई खतरा पैदा होई गेदा ऐ। जिला प्रशासन पुलस ते आपदा राहत बल दियां टीमां लोकें गी बचाने लेई सुरक्षित थाहरें पुजाने दे कम्मै च लग्गी पेदियां न। इस बारै जानकारी दिंदे होई जिला विकास कमिशनर हरविंद्र सिंह होरें आखेआ।

तोआई, श्री माता वैश्वो देवी जात्तरा मार्ग पर अद्द कुंवारी च इंद्रपरस्त भोजनालय दे कोल ल्हास-पस्सियां पौने करी किश लोकें दे जख्मी होने दी खबर ऐ। बचा आहले अमला ते मशीनरी कन्नै बचाव अभियान शुरू करी दित्ता गेदा ऐ। इस घटना दे मगरा श्री माता वैश्वो देवी श्राइन बोर्ड नै जात्तरा गी आरजी तौरा पर रोक्की दित्ता ऐ।

<><><><><><>

मौलेधार बरखा कन्नै प्रभावित सब्बनें जिलें च बक्ख-बक्ख मैहकमे हाई अलर्ट पर न ते विस्थापितें गी सुरक्षित थाहरें पर पजाने दे प्रयास शुरू करी दित्ते गेदे न। हर जिले च हेल्पलाइन स्थापित कीतियां गेइयां न स्थानीय पुलस, हाड नियंत्रण ते सिंचाई मैहकमे, सेहत सेवां ते एमरजेंसी सेवां हाई अलर्ट पर न। सरकार नै हुक्म रसाल कीता ऐ जे हाड सुरक्षा कम्में च शामिल कोई बी अधिकारी इनें जिलें च इस बेल्ले कोई छुट्टी नेई लेई सकोग। इस दरान अधिकारिएं जम्मू संभाग दे सब्बनें 10एं जिलें आस्तै हेल्पलाइन नंबर जारी कीते न। एह नंबर न, जम्मू लेई 0191-25-71-616, साम्बा आस्तै 01923-241-004, कठुआ लेई 01922-238-796, डोडा आस्तै 9596-77-62-03 ते किश्तवाड आस्तै नंबर ऐ 9484-21-74-92..। एह सारे नम्बर सब्बनें आधिकारिक सोशल मीडिया प्लैटफार्में उप्पर उपलब्ध न। लोक कुसै बी आपातकालीन स्थिति च इनें टेलीफोन नम्बरें उप्पर संपर्क करी सकदे न। उधमपुर दे ए.एस.पी संदीप भट्ट थमां होर जानकारी।

<><><><><><>

Schools Closed

जम्मू प्रांतै च जारी भारी बरखें ते एहदे करी बने दे हालात गी ध्यानै च रखदे होई सब्बै सरकारी ते प्राइवेट स्कूल कल बुधवारें 27 अगस्त गी बी बंद रखे जाडन। जम्मू-कश्मीर स्कूली शिक्षा बोर्ड नै बी कल 27 अगस्त गी लैते जाने आहले 10मी ते 11मी क्लास दे मतेयान बी अगड़े पाई दित्ते गे न। इनें मतेयानें लेई नमिएं तरीकें दी घोषणा मगरा बक्खरे तौरा पर कीती जाह्ग।

<><><><><><>

Traffic Halted

जम्मू-श्रीनगर राश्ट्रीय जरनैली शिड़क (एन.एच-44) पर पुस्सियां पौने, कुप्पड़ डिग्गने ते बक्ख-बक्ख खेत्तरें च जारी भारी बरखा दे कारण आम दोरफ्त रोक़ी दित्ती गेई ऐ। अधिकारिएं सलाह दित्ती ऐ जे जात्रिएं गी उस्सलै तगर जात्तरा करने कोला परहेज करना चाइदा जिस्सलै तगर मौसम च सुधार नेई होई जंदा ते शिड़कै गी पूरी चाल्ली साफ नेई करी दित्ता जंदा। पस्सियां पौने ते हाड दे कारण जम्मू शा उधमपुर जाने आह्ला रस्ता बी बंद ऐ। एहदे अलावा भारी बरखा दे चलदे रियासी जिले च कटड़ा-शिवखोड़ी शिड़क बी बंद होई गेदी ऐ जेदे करी ट्रैफिक गी कन्नै लगदे होरनें वैकल्पिक रस्तें आहली बक्खी मोड़ी दित्ता गेआ ऐ। जात्रिएं गी सलाह दित्ती जंदी ऐ जे आधिकारिक स्रोतें राहें ट्रैफिक अपडेट दे बारै च सूचना हासल करदे रौहन।

<><><><><><>

Teacher-Award

जम्मू-कश्मीर आस्तै इक्क गौरवपूर्ण पल च सरकारी हायर सैकेंडरी स्कूल जिंद्राह दे अध्यापक कुलदीप गुप्ता होरें गी प्रतिष्ठित राश्ट्रीय शिक्षक पुरस्कार 2025 आस्तै चुनेआ गेआ ऐ। गुप्ता होर शिक्षा दे खेत्तर च उन्दे असाधारण योगदान आस्तै देशभर थमां चुने गेदे 45एं शिक्षकें बिच्चा इक्क न। पुरस्कार समारोह औंदी 5 सितंबर गी विज्ञान भवन नमीं दिल्ली च शिक्षक दिवस दे मौके पर होग। गुप्ता होरें'गी इक्क सर्टिफिकेट, 50 ज्हार रपे दा नकद ईनाम ते इक्क चांदी दा तगमा दित्ता जाग। उनेंगी इस पुरस्कार लेई चुने जाने पर इस खेत्तर दा मान बधेया ऐ। विद्यार्थियें, सहयोगिएं ते अधिकारिएं इस उपलब्धि गी उन्दे जत्तें आस्तै इक्क काबल मानता दे रूपै च दस्सेआ ऐ।

<><><><><><>

Football

जम्मू-कश्मीर दे फुटबाल खडारी दानिश फारूक भट्ट नै भारत दी राश्ट्रीय सतह दी फुटबाल टीम च शामिल होइयै समूलचे केंद्र शांति प्रदेश दा मान बधाया ऐ। जम्मू-कश्मीर बैंक दी फुटबाल टीम च रेही चुके दे दानिश नै अपनी प्रतिभा ते निष्ठा कारण राश्ट्रीय सतह पर मानता ते पंछान हासल कीती ऐ। इस मौके दानिश फारूक गी ममारकबाद दिंदे होई मुखमंत्री उमर अब्दुल्ला होरें उनेंगी शुभकामनां दित्तियां न। अपनी इक सोशल मीडिया

पोस्ट च उनें आखेआ ऐ जे दानिश तुसेंगी ममारकबाद ते शुभकामनां, मेद करना जे तुस इस्सै चाल्ली अपना होर नां करदे रवो। मुखमंत्री होरें मकामी फुटबाल कोला लेइयै राश्ट्री टीम च शामिल होने दे उंदे सफर दा जिक्र करदे होई उनेंगी समूलचे जम्मू-कश्मीर दे नौजवानें लेई इक प्रेरणा दस्सेआ ऐ।

<><><><><><>
